

元史

冊五

元史卷八十五

明翰林學士亞中大夫知制誥兼修國史宋 濂等修

百官志第三十五

百官一

王者南面以聽天下之治建邦啓土設官分職其制尙矣漢唐以來雖沿革不同恆因周秦之故以爲損益亦無大相遠大要欲得賢才用之以佐天子理萬民也元太祖起自朔土統有其衆部落野處非有城郭之制國俗淳厚非有庶事之繁惟以萬戶統軍旅以斷事官治政刑任用者不過一二親貴重臣耳及取中原太宗始立十路宣課司選儒臣用之金人來歸者因其故官若行省若

院則以行省元帥授之草創之初固未暇爲經久之規矣世祖卽位登用老成夫新制作立朝儀造都邑遂命劉秉忠許衡酌古今之宜定內外之官其總

政務者曰中書省秉兵柄者曰樞密院司黜陟者曰御史臺體統旣立其次在內者則有寺有監有衛有府在外者則有行省有行臺有宣慰司有廉訪司其

牧民者則曰路曰府曰州曰縣官有常職位有常員其長則蒙古人爲之而漢人南人貳焉於是一代之制始備百年之間子孫有所憑藉矣大德以後承平日久彌文之習勝而質簡之意微僥倖之門多而方正之路塞官冗於上吏肆於下言事者屢疏論列而朝廷訖莫正之勢固然也大抵元之建官繁簡因乎時得失係乎人故取其簡牘所載而論次之若其因事而置事已則罷與夫異教雜流世襲之屬名類實繁亦姑舉其大概作百官志

三公太師太傅太保各一員正一品銀印以道燮陰陽經邦國有元襲其名號特示尊崇太祖十二年以國王置太師一員太宗卽位建三公其拜罷歲月皆不可考世祖之世其職常缺而僅置太保一員至成宗武宗而後三公並建而無虛位矣又有所謂大司徒司徒太尉之屬或置或不置其置者或開府或不開府而東宮嘗置三師三少蓋亦不恆有也

中書令一員銀印典領百官會決庶務太宗以相臣爲之世祖以皇太子兼之至元十年立皇太子行中書令大德十一年以皇太子領中書令延祐三年復

以皇太子行中書令置屬監印二人

右丞相左丞相各一員正一品銀印統六官率百司居令之次令缺則總省事佐天子理萬機國初職名未創太宗始置右丞相一員左丞相一員世祖中統元年置丞相一員二年復置右丞相二員左丞相二員至元二年增置丞相五員七年立尙書省置丞相二員八年罷尙書省乃置丞相二員二十四年復立尙書省其中書省丞相二員如故二十九年以尙書再罷專任一相武宗至大二年復置尙書省丞相二員中書丞相二員四年尙書省仍歸中書丞相凡二員自後因之不易文宗至順元年專任右相其一或置或不置

平章政事四員從一品掌機務貳丞相凡軍國重事無不由之世祖中統元年置平章二員二年置平章四員至元七年置尙書省設尙書平章二員八年尙書併入中書平章復設三員二十三年詔清冗職平章汰爲二員二十四年復尙書省中書尙書兩省平章各二員二十九年罷尙書省增中書平章爲五員而一員爲商議省事三十年又增平章爲六員成宗元貞元年改商議省事爲

平章軍國重事武宗至大二年再立尙書省平章三員中書五員四年罷尙書省歸中書平章仍五員文宗至順元年定置四員自後因之

右丞一員正二品左丞一員正二品副宰相裁成庶務號左右轄世祖中統二年置左右丞各一員三年增爲四員至元七年立尙書省中書右丞左丞仍四員八年尙書併入中書省右左丞各一員二十二年汰冗職右左丞如故二十四年復立尙書省左右丞各一而中書省缺員二十八年復罷尙書省三十年設右丞二員而一員爲商議省事成宗元貞元年右丞商議省事者又以昭文大學士與中書省事武宗至大一年復立尙書省右左丞二員中書右左丞五員四年罷尙書右左丞中書右左丞止設四員文宗至順元年定置右丞一員左丞一員而由是不復增損

參政二員從二品副宰相以參大政而其職亞於右左丞世祖中統元年始置參政一員二年增爲二員至元七年立尙書省參政三員八年尙書併入中書參政二員二十三年汰冗職參政二員如故二十四年復立尙書省參政二員

中書參政二員二十八年罷尙書省參政武宗至大二年復置尙書省參政二員中書參政二員四年併尙書省入中書參政三員文宗至順元年定參政爲二員自後因之

參議中書省事秩正四品典左右司文牘爲六曹之管轄軍國重事咸預決焉中統元年始置一員至元二十二年累增至六員大德元年止置四員後遂爲定額其治曰參議府令史二人

左司郎中二員正五品員外郎二員正六品都事二員正七品中統元年置左右司至元十五年分置兩司左司所掌吏禮房之科有九一曰南吏二曰北吏三曰貼黃四曰保舉五曰禮六曰時政記七曰封贈八曰牌印九曰好事知除房之科有五一日次品二曰常選三曰臺院選四曰見闕選五曰別里哥選戶雜房之科有七一曰定俸二曰衣裝三曰羊馬四曰置計五曰田土六曰太府監七曰會總科糧房之科有六一曰海運二曰饋運三曰邊遠四曰賑濟五曰事故六曰軍匠銀鈔房之科有二一日鈔法二曰課程應辦房之科有二一日

飲膳二曰草料令史二人蒙古書寫一十人回回書寫一人漢人書寫七人典吏十五人

右司郎中二員正五品員外郎二員正六品都事二員正七品中統元年置左右司至元十五年分置兩司右司所掌兵房之科有五一日邊關二曰站赤三曰鋪馬四曰屯田五曰牧地刑房之科有六一曰法令二曰弭盜三曰功賞四曰禁治五曰枉勘六曰鬪訟工房之科有六一曰橫造軍器二曰常課段疋三曰歲賜四曰營造五曰應辦六曰河道令史二人蒙古書寫三人回回書寫一人漢人書寫一人典吏五人

中書省掾屬

監印二人掌監視省印有中書令則置

知印四人掌執用省印

怯里馬赤四人

蒙古必闡赤二十二人在司十六人右司六人

漢人省掾六十人左司三十九人右司二十一人

回回省掾十四人左司九人右司五人

宣使五十人

省醫三人

玉典赤四十一人

斷事官秩三品掌刑政之屬國初嘗以相臣任之其名甚重其員數增損不常其人則皆御位下及中宮東宮諸王各投下怯薛丹等人爲之中統元年一十六位下置三十一員至元六年十七位下置三十四員七年十八位下置三十五員八年始給印二十七年分立兩省而斷事官隨省並置二十八年十八位下置三十六員併入中書三十一年增二員後定置自御位下及諸王位下共置四十一員首領官經歷一員知事一員吏屬蒙古必闡赤二人令史一十二人回回令史一人怯里馬赤二人知印二人奏差八人典吏一人

客省使秩正五品使四員正五品副使二員正六品令史一人掌直省舍人宣使等員選舉差遣之事至元九年置使二員一員兼通事一員不兼大德元年增置四員副二員直省舍人二員至元七年始置後增至三十三員掌奏事給使差遣之役

檢校官四員正七品掌檢校左右司六部公事程期文牘稽失之事書吏六人大德元年置

昭磨一員正八品掌磨勘左右司錢穀出納營繕料例凡數計文牘簿籍之事中統元年置二員至元八年省爲一員典吏八人

管勾一員正八品掌出納四方文移緘滕啓拆之事郵遞之程期曹屬之承受兼主之中統元年置二員至元三年定爲一員典吏八人

架閣庫管勾二員正八品掌度藏省府籍帳案牘凡備稽考之文卽掌故之任至元三年始置二員其後增置員數不一至順初定爲二員典吏十人蒙古架閣庫兼管勾一員典吏二人回回架閣庫管勾一員典吏二人

吏部尙書三員正三品侍郎二員正四品郎中二員從五品員外郎二員從六品掌天下官吏選授之政令凡職官銓綜之典吏員調補之格封勳爵邑之制考課殿最之法悉以任之世祖中統元年以吏戶禮爲左三部尙書二員侍郎二員郎中四員員外郎六員至元元年以吏禮自爲一部尙書三員侍郎仍二員郎中仍四員員外郎三員三年復爲左三部五年又合爲吏禮部尙書仍二員侍郎郎中員外郎各一員七年始列尙書六部吏部尙書一員侍郎一員郎中二員員外郎二員八年仍爲吏禮部尙書侍郎郎中各一員員外郎仍二員十三年分置吏部尙書增置七員侍郎三員郎中二員員外郎四員十九年尙書裁爲二員侍郎一員郎中一員員外郎二員二十一年尙書三員侍郎一員郎中員外郎如故二十三年定六部尙書侍郎郎中員外郎員額各二員二十年增尙書爲三員主事三員蒙古必闡赤三人令史二十五人回回令史二人怯里馬赤一人知印二人奏差六人蒙古書寫二人銓寫五人典吏一十九人

戶部尙書三員正三品侍郎二員正四品郎中二員從五品員外郎三員從六品掌天下戶口錢糧田土之政令凡貢賦出納之經金幣轉通之法府藏委積之實物貨貴賤之直斂散准駁之宜悉以任之中統元年以吏戶禮爲左三部尙書二員侍郎二員郎中四員員外郎六員至元元年分立戶部尙書三員侍郎郎中四員員外郎省爲三員三年復爲左三部五年復分爲戶部尙書一員侍郎郎中各一員員外郎又省爲二員七年始列尙書六部尙書二員侍郎二員郎中二員員外郎如故十三年尙書增置一員侍郎郎中員外郎如故十九年郎中員外郎俱增至四員二十三年六部尙書侍郎郎中定以二員爲額明年以戶部所掌視他部特爲繁劇增置二員成宗大德五年省尙書一員員外郎亦省一員各設三員主事八員蒙古必闡赤七人令史六十一人回回令史六人怯里馬赤一人知印二人奏差三十二人蒙古書寫一人典吏二十二人司計官四人其屬附見于後

都提舉萬億寶源庫掌寶鈔玉器至元二十五年始置都提舉一員正四品

提舉一員正五品同提舉一員從五品副提舉一員從六品知事一員從八品提控案牘一員司吏二十三人譯史二人司庫四十六人內以色目二人參之

都提舉萬億廣源庫掌香藥紙劄諸物設置同上提控案牘二員司吏一十二人譯史一人司庫一十三人

都提舉萬億綺源庫掌諸色段疋設置並同上而副提舉則增一員提控案牘設三員後省二員司吏二十二譯史一人司庫二十六人內參用色目二人

都提舉萬億賦源庫掌絲綿布帛諸物設置並同上提控案牘二員其後省一員司吏一十七人譯史一人司庫一十五人內參用色目二人
四庫照磨兼架閣庫管勾一員從九品世祖至元二十八年以四庫錢帛事繁始置一員仍給印

提舉富寧庫至元二十七年始創提舉一員從五品同提舉一員從六品副

提舉一員從七品分掌萬億寶源庫出納金銀之事吏目一人其後司吏增至六人譯史一人司庫八人

諸路寶鈔提舉司達魯花赤一員正四品都提舉一員正四品副達魯花赤一員正五品提舉一員正五品同提舉一員從五品副提舉二員從六品知事一員從八品照磨一員從九品國初戶部兼領交鈔公事世祖至元始設交鈔提舉司秩正五品二十四年改諸路寶鈔都提舉司陞正四品增副達魯花赤提控案牘各一員其後定置已上官員提控案牘又增一員設司吏十二人蒙古必闡赤一人回回令史一人奏差七人

寶鈔總庫達魯花赤一員從五品大使一員從五品副使三員正七品世祖至元二十五年改元寶庫爲寶鈔庫秩正六品二十六年陞從五品增大使副使設司庫其後遂定置已上官員司吏七人譯史一人司庫五十人

印造寶鈔庫達魯花赤一員正七品大使二員從七品副使二員正八品中統四年始置秩從八品至元二十四年陞從七品增達魯花赤一人其後遂

定置已上官員

燒鈔東西二庫達魯花赤一員正八品大使一員從八品副使一員從九品至元元年始置昏鈔庫用正九品印置監燒昏鈔官二十四年分立燒鈔東西二庫秩從八品各置達魯花赤大使副使等員

行用六庫中統元年初立中都行用庫秩從七品提領一員從七品大使一員從八品副使一員從九品至元二十四年京師改置庫者三曰光熙曰文明曰順承因城門之名爲額二十六年又置三庫曰健德曰和義曰崇仁並因城門以爲名

大都宣課提舉司掌諸色課程併領京城各市提舉二員從五品同提舉一員從六品副提舉一員從七品提控案牘一員司吏六人世祖至元十九年併大都舊城兩稅務爲大都稅課提舉司至武宗至大元年改宣課提舉司其屬四

馬市猪羊市秩從七品提領一員從七品大使一員從八品副使一員從

九品世祖至元三十年始置

牛驢市果木市品秩設官同上

魚蟹市大使一員副使二員至大元年始置

煤木所提領一員從八品大使一員從九品副使一員至元二十二年始置

大都酒課提舉司掌酒醋榷酤之事至元十九年始置提舉一員從五品同提舉二員從六品副提舉二員從七品提控案牘二員司吏五人二十八年省同提舉一員副提舉一員餘如故

抄紙坊提領一員正八品大使一員從八品副使二員從九品中統四年始置用九品印止設大使副使各一員至元二十七年陞正八品增置提領副使各一員

印造鹽茶等引局大使一員副使一員至元二十四年置掌印造腹裏行省鹽茶礬鐵等引仍置攢典庫子各一人

右以上屬戶部其萬億四庫國初以太府掌內帑之出納既設左藏等庫而國計之領在戶部仍置萬億等庫爲收藏之府中統元年置庫官六員而未有品秩俸給至元十六年始爲提舉萬億庫秩正五品二十四年改陞都提舉萬億庫秩正四品二十五年分立四庫以分掌出納至二十七年又別立富寧庫焉

京畿都漕運使司秩正三品運使二員正三品同知二員正四品副使二員正五品判官二員正六品經歷一員正七品知事一員從八品提控案牘兼照磨二員掌凡漕運之事世祖中統二年初立軍儲所尋改漕運所至元五年改漕運司秩五品十二年改都漕運司秩五品十九年改京畿都漕運使司秩正三品二十四年內外分立兩運司而京畿都漕運司之額如舊止領在京諸倉出納糧斛及新運糧提舉司站車攢運公事省同知運判知事各一員而押綱官隸焉延祐六年增同知副使運判各一員其後定置官員已上正官各二員首領官四員吏屬令史二十一人譯史二人回回令史一人

通事一人知印二人奏差一十六人典吏二人其屬二十有四

一新運糧提舉司秩正五品至元十六年始置管站車二百五十輛隸兵部

開設運糧填河改隸戶部定置達魯花赤一員都提舉一員同提舉二員

副提舉一員吏目一員司吏八人奏差十二人

京師二十二倉秩正七品

萬斯北倉

中統二年置

萬斯南倉

至元二十四年置

千斯倉

中統二年置

永平倉

至元十六年置

永濟倉

至元四年置

惟億倉

既盈倉

大有倉

並係皇慶元年置

屢豐倉

積貯倉

並係皇慶元年增置

已上十倉每倉各置監支納一員正七品大使二員從七品副使二員

正八品

豐穰倉

皇慶元年置

廣濟倉

皇慶元年置